

Kosovoren etnia aniztasuna bermatu nahi dute Frantziak eta NATOk

Holbrookek Belgraderi leporatu dio Mitrovicako gatazken akuilatzaile izatea

Erredakzioa / Donostia

◀ Mitrovican azken egunotan bizi den tentsioak berriro ere erakusterat ematen badu, albaniar eta serbiarren arteko elkarbizitza ezinezkoa dela, NATOk aniztasun etnikoko Kosovo bati eutsi nahi dio. Europako Batasuneko partaideen artean, halaber pentsatzen du Frantziak.

«KOSOVON geratzen diren serbiarren eskubideak babestu behar ditugu» adierazi du, behin eta berriro, Frantziako Atzerri ministro Hubert Védrinek. «Gure asmoa ez da, inola ere, Kosovoren homogenotasuna bultzatzea, albaniar bizilagunen inguruan» azpimarratu du, halaber, Védrinek. «Erabat albaniarrez osatutako etnia bakarrek Kosovo bat bolborategi baten antzeko zerbait litzateke, hots, Mazedonia zartaraz lezakeen eta eskualde horretan gerra bat gehiago haziko lukeen etengabeko arazo iturri» iritzi diote, berriz, Balkanetako herrietan banatutako diplomata frantziarrek.

NATOko Idazkari Nagusi Georges Robertsonek ere bat egin du frantses agintarien iritzi honekin eta «NATO eutsiko dio beti aniztasun etnikoko Kosovo bati» eman du aditzerat.

Haatik, bai Frantziak, bai Europako Batasunak, bai NATOk ere aitortu behar izan dute Kosovon nagusitu den egoera mendealdeko potentzietako agintari politiko eta militarren hutsegite batetik datorrela. Ezen, Serbiako Gobernuarekin NATOk azkenean lortutako akordioak zehazten zuenez, Aliantza Atlantikoko indarrek berehala zabaldu behar zuten Kosovo osoan, UÇK Kosovoren Askapenerako Armadari aurrea hartuta. Alabaina, ez zen horrelakorik gertatu eta UÇKko unitateak NATOkoak baino lehen edo denbora berean zabaltzearekin, Kosovon geratzeko asmoa zaukaten serbiarrek ihes egin behar izan zuten, nahitaez. Hauetatik zenbait, hala ere, Mitrovican eta inguruan geratu ziren, lasaitasunez hartu baitzuten sektore hori Kforreko soldadu frantziarren ardurapean izatea.



Kosovoko albaniar bat atxilotzen Kforreko soldadu britainiarrek, herenegun iluntzean, Mitrovican.

BORIS GRDANOSKI / AP

Apirilean Eurogorputzak hartuko du Kforren agintea

■ MITROVICAN egunotan gertatu diren gatazkak eragozteko xedez zabaldu diren Kfor bake indarrek unitate gutiz-gehienak Europako herrietako soldaduz osatutakoak dira.

Egoera hau ikus daiteke Europako defentsa bateratu baten lehen urratsa bezala. Izan ere, datorren apirilean, Landcent deitutako egiturak, hots Euro-

pa erdialdeko NATOko lur armada indarrak, lekua utziko dio Eurogorputzari, beraz, Alemania, Frantzia, Belgika, Espainia eta Luxemburgoko soldaduz osatutako defentsa eraikidurari.

Honen ondorioz, Kforreko indarrak Espainiako Juan Ortuno jeneralaren agindupean egongo dira, zeren eta hau baita Eurogorputza-

ren agintaritza nagusirat izendatua izan, 1999ko azaroaren 26an. Hargatik, Kforreko agintaldea Eurogorputzaren menpekoa izango bada ere, bake indarreko unitateek nazio askotakoak izaten jarraituko dute. Gaur egun, Kosovon hedatuta dauden 37.200 soldaduak 36 herritatik datoz, nahiz eta kopuru handienak Europa-

ko herriek bidalitakoak izan. Zehazki, lau soldadutatik hiru bederatzi herrialdeetakoak dira, hauek direla EBn dauden Italia (4.200 soldadu), Alemania (3.900), Frantzia (3.900), Erresuma Batua (3000), Holanda (1.400), Grezia (1.100) eta Espainia (900) eta EBtik kanpo diren Errusia (3.150) eta Norvegia (1.000).

Belgrad: «Meategiez jabetu nahi dira»

Nazio Batuetan EEBBen ordezkari Richard Holbrookek Belgradeko Gobernuari leporatu zion, joan den astelehenean, Mitrovicako gatazken akuilatzailea izatea.

Jugoslaviako agintearen

erantzuna berehalakoa izan da, zeren eta Goran Matic Informazio ministroak adierazi zuenez atzo, «mendealdeko potentziak daude albaniar terrorismo eta separatismoaren atzean; beraiek dute UÇKren sorrera bultzatu eta Balkanetan beste gatazka bat piztu, honen guztiaren hel-

burua delarik NATOren nagusitasuna sendotzea eskualde honetan». Maticek, ildo beretik, Holbrooke, Robertson eta NATO akusatu zituen serbiarrak Mitrovicatik haizatu nahi dituztela herrialde horretan dauden urre, zilar, berun eta zink meategiez jabetzeko asmoz.

CDUren Meinzeko bulegoak miatu ditu Bonnekoko Fiskaltzak

■ Friedrich Merz ez zuten atzo CDU-CSUren talde parlamentarioko buruzagi izendatu

Erredakzioa / Berlin

◀ ALEMANIAKO CDU Batasun Kristaudemokratak Meinz hirian, Renania-Palatinatua landerrean, dituen bulegoak miatu zituen atzo Bonnekoko Fiskaltzak. Miaketak zerikusia du Helmut Kohl Alemaniako kantziler ohiaren aurkako ikerketarekin, ezkutuko kontuak direla eta.

Bernd Koenig fiskalak ez zuen argitu CDUren Meinzko bulegoan ezer atzeman zenik. Baina halakoetan beti zenbait txosten hartzen direla azpimarratu zuen.

Fiskaltzaren lanak Kohl auziarekin lotura duela zehaztu zuen Koenigek. Hain zuzen, kantziler ohiaren laguntzaile izendakoekin zerikusia baduela gaineratu zuen. Baina ez du loturatik Renania-Palatinatuko CDUrekin.

Epaitegiek joan den ostiralean eman zioten baimena Fiskaltzari, CDUren Meinzeko bulegoak miatzeko. Kohlen etxebizitza arakatzeko baietza ere jaso zuen Fiskaltzak. Herenegun egin behar zen araketa, baina Fiskaltzak bertan behera utzi zuen ekintza. Izan ere, *Der Spiegel* egunkariak joan den asteburuan kaleratu zuen Fiskaltzaren asmoen berri.

Filtrazioa argitzeko ikerketa

Fiskaltza ikertzen hasiko da Kohlen etxebizitza miatzeko asmoa egunkariari nork jakinarazi zion argitzeko.

Bestalde, CDUK ez zuen atzo izendatu Friedrich Merz CDU-CSUren talde parlamentarioko buruzagi. Joan den asteen hala aurreikusitako, baina CDUK atzera egin zuen, CSUK eskatu ziolako.

Schleswig-Holstein landerreko hauteskundeak egin arte itxoiteko esan zion CSUK CDUri, eta horiek igandean dira. Horregatik, CDUK hilaren 29an izendatuko du ziu-rrerik Merz.